

Transkription von Urkunde KIL 1379f

Ort, Datierung: Kiel, 1379-07-25

Signatur: Stadtarchiv Kiel, Akte 48692, 48

Inhalt: Tydeke Rekelyngheshusen: Münzprägung

Ik tydeke rekelyngheshusen . mu(n)tmester tō dem kyle . byken(n)e openbare . vor alden . ghene(n) de
dessen Jeghe(n)war/dighen opene(n) bref seen . vn(de) hōre(n) lesen . dat ik myd . wol byradene mūde
. a(n)namet vn(de) . entfanghen . hebbe . der / here(n) mu(n)te also des rades tō deme kyle bette tō des
sondaghes tō vastelauene . de nū neghest tō komede is / also eyn keyser recht . vn(de) eyn mu(n)ter
recht is . Jndesser wys also hir na screue(n) steyt . Dat grote gheld de / weghene mark scal holde(n) im
wychte . vere mark vere scillynghe myn . vn(de) twe wytte penynghe vnthō=/varne . vn(de) in styckene
des suluers drūtteynhalf lōd . na lubescheme tekene . vn(de) eyn quantyn / vnthovarne . vn(de) dat
Lutteke klene gheld dat scal holde(n) in wichte de weghene mark . dre . mark / dryer scillinghe myn .
vn(de) vere klene pe(n)nýnghe vnthovarne . vn(de) de weghene mark . de scal holden / in suluer achte
lōd na Lubescheme tekene vn(de) eyn half quantyn vnthōvarne Dese vor varynghe / de . scole(n) . de
mu(n)theren vor varen . vp myneme mu(n)testōcke . we(re) ok ift ik in desser vorscreuene
vor=/varynghe . vnrechte . vu(n)den worde . so scal ik myn recht dar vm(m)e . stan . vn(de) . byken(n)e
vort dat ik vn(de) / myne rechten erfname(n) gheue(n) scole(n) . vn(de) wyllen den vorbenomede(n)
he(re)n also dem rade twyntich mark / kylescher mu(n)te vn(de) pe(n)nýnghe . vor de vorscreuene . ere
mu(n)te tho vastelauene nū neghest tho komende / Is vnbýwōrren Tho groterer bytūgnesse . vn(de)
bywýsinghe desser vorscreuene stücke so Is myn Inghe=/seghel . myd wylle(n) vn(de) myd bý rademe
mūde . vor dessen bref henghet Gheue(n) tō dem kyle Na godes bort / drutteynhu(n)dert Jar dar na In
deme Neghe(n) vn(de) Seue(n)tighesten Jare . Jndeme daghe . des . hilge(n) he(re)n Su(n)te / Jacobes
des hylghen apostoles